

NOLA JASO LEIKEN EUSKERA

Erri. — Parre egiteko, umeai seaskan eragiteko ta sagardoa edateko, bakarrik balio dula euskerak esan leikek, Auzo.

Auzo. — ¿Zergatik ba?

Erri. — Euskeraren alde dabilten askok eta askok, euskera jasotzeko, bertsok eta ipuyak saritzea besterik ez ditek sumatzen ta.

Auzo. — Euskerazko bertsuak eta ipuyak saritzea, oso ongi arkitzen, diat, *Erri*, euskera zerbait piztutzeko.

Erri. — Ongi arkitzetik bear aña arkitzea, alde aundia zegok. Eleak (lenguaje) ordea bertsuak eta ipuyak baño ikaste bearraguak baizetiek. Euskera, gai dek gizonak bear bear dituen oraingo aurrerapen guziak adirazteko ta bizitzeko, bertsuak baño len dituk salerosketako artu emanak nola esan jakitea.

Auzo. — Orduan ¿ezaiz bertso ta ipui zalea?

Erri. — Bai, bertso ta ipui zale naizen arren, euskera gora jasotzeko, bizikera berriaren jantziz ornitu bear diagu,

Bertso ta ipuyak, elearen azkeneko lorak dituk; azal-apañetan dabiltenen esan-pitxiak: ongi parra egiten dek, ongi jan ondoren.

Auzo. — ¡Orixen dek tripa-zale aona!

Jan aurretik, janaren pozean parra egiten ditek ba amaikak.....

Erri. — Jan aurretik edo jan ondoren, jana gatik beñepein parra egiten ditek; jana beraz, parra baño len dek.

Auzo. — ¿Zertarako dakarrek orrenbeste parra ta jana?

Erri. — Esan diat goyen. Euskera, jolatzeko bakarrik dala uste die euskal-lanetan dabilten askok; eta euskera, euskal-errian bizitzeko bear bear ez dan artean, bultzada aundirik ez dik izango gure izkera zarrak.

Auzo. — ¿Zer egingo uke ba ik euskera zabaltzeko ta indartzeko?

Erri. — Euskera'ri euzteko, dirua erakutziko niokek.

Auzo. — Bestek ere orixe bera egiten ditek, bertso ederrakatik dirua eman.

Erri. — Bertso ta ipui egilleai naiko diru eman zayek. Beste bide berriak iriki bear giñuzkek, bide eragilleak.....

Auzo. — ¿Zein bide gero?

Erri. — Aditu itzak:

1.^a Sariak jarri, sei illabetetan edo idazkirik geyena euskeraz egiten dituenentzat. (Ortarako baldintasunak izango ituzke lagun bati berari idazki bat baño geigo ezin egin izatea; zortziro baño sarriko ez idaztea; jaun aundizkiai idazkiak egitea, t'abar.)

2.^a Atal-buruetan euskerazko iragarki geyena jarazten dituenentzat sariak.

3.^a Gauza-saltzalleai ta gauza egilleai esan, euskeraz eren iragarriak egiten badituzte, EUSKAL-ERRIA ta beste ingurtzetan utsean, ainbeste aldi jakiflean jarriko dirala beren iragarkiak. Baita ere egin leikena dek: euskeraz iragarbiak dituzten salerosleai ortarako zabaltzalleak bildu ta etxez etxe barreatu, ta gañera onuratu inor, euskal-iragarkien dendatik bakarrik erosteko.

4.^a Euskeldun saltzalleak elkartu ta agindu erostunei, euskeraz gauza eskatzen duanari amar zentimoz edo, gauzea merkego saldu.

5.^a Erostunek elkar artu, euskeraz bakarrik mintzatzen ta idazten dandendetatik erosteko.

6.^a Sal-erosketako erraldak euskeraz eraman azi gere saltzalleai, bestelaez erosi.

Auzo. — Neurri gogorrak ituzke oyek.

Erri. — Gauzak estu artzen ezpadira, beti egiteko geratzen dituk ba. Zerbait maite danean ta aurrera eramatekaz, neurri estu estuak artu bear nai ta nai ez.

Auzo. — Euskeldun askok euskeraz irakurtzen etzekitek eta ¿zeñek irakurri aziko lizkiekek euskal-iragarki oyek?

Erri. — Bearrak eta beltzak euskeraz irakurri aziko liekek. Dirukatik gauza nekegarriak egiten dituk, eta euskera, dirua irabazi bearrakin elkartzen badiagu, zalantza gabe sinistu dezagun euskera ikastera beartuko dirala diru zaleak.

Auzo. — Euskeldun geyenak diru zale gaituk ba.....

Erri. — Bai, baño euskeldun askok etzekitek euskal-errian askoz diru gutxigo dabillega erdera banatzen ari dalako.

Auzo. — Orixo ederra dek orregatik: erdera jakinda diru geigo irabazten zala uste nian ta.

Erri. — Ezetz erakutzi diat beste batean.